

لَسَّه الدُّخْلَه دَايَه

كنت باحلم إني باغزل
من خيوط الشمس توبك للزفاف
وانتي قال بتستحمي
والحبايب سهرانين..
في الميدان بينجدوا مخده ولحاف
زى ما شاركوني همي
والفرح دايمًا يشيل
زى صوتك والهديل
والأغاني طايره بينا
بس ما تشفيش غليل

قلت أفتَّح عيني يمكن
كل شيء جايز وممكن

إلتقيت الناس ياهووه
بالألوف ما لهمش آخر
بحر هايج موجّه عالي
جاي والأعلام بواخر
مصر قامت بالسلامه؟
يا حبيبي ودي العلامه؟
واللا جا وقت الحساب..
وان ده يوم القيامه؟

أسئله بتروح وتيجي
والنهار طالع مليجي
طفل يحبي حبه حبه
والغيلان بتستخبئي
بس كل شويه ترجع
دَحْلَبَه وتَلْبُه لَبَه

قلت اخش الحلم اشوفك
صاحيه تيجي تكلمينا
التقيت الناس فصايل
كل مجموعه فـ سفينه
والطريق مش سكه واحده
كل بوصله شايفه مينا

ابتديت من تاني اكمل غزل توبك
وافرش المطرح محبه
بكره تيجي الشمس تملالك دروبك
نورها نار في القلب شابه
الليلاذي الحنه دايره
والفرح منصوب عشاني
كلها ليلتين وانولك
واطفى نار مشعلاني
قالوا لسه الدخله دايه
والعريس دا صف تاني